



**L**Azarus ex nobili familia Schuuendiorum natus, & multis uirtutibus educatus est. Is adolescens in academia Basiliensi operam literis dedit, & Simone Grynæo præceptore usus, in artium & linguarum studio plurimum profecit. Postea uerò bellorum studia secutus, ad Caroli Imperatoris curiam peruenit, et res sibi commissas magna diligentia expediuit. Itaq; Cæsari gratus multis honoribus auctus fuit. Cum etiam bellum Smalkaldicum instaret, Carolus hunc Lazarum Augustâ, Argentinam, & Vlmam legatum misit, atq; quorundam principum proteruita declarata, eas ciuitates quiescere iussit. In eo bello Lazarus Cæsari egregiâ operâ præstitit, atq; ordines ducere iussus fuit.

Postea quoq; 1547 cum Elector Saxonie captus esset, cum præsidio militum Gotham missus, ut eam arcē dirueret, & Albertum Brandenburgicum captiuum liberaret. Deinde cum Auguste Vindelicorum sequenti anno Carolus comitia celebraret, huic Lazaro negotium dedit, ut Vuisenburgum profectus Sebastianum Vogelspergerû caperet, & Augustam perduceret. Is ad decem signa peditum à Germania in Galliam abduxerat, & in autumno domum redierat, id quod Lazarus singulâ industria perfecit. Itaq; Vogelspergerus cum Iacobo Mantello & Vuolffio Thoma capitaneis capite plexus fuit, die septimo Februar. Schuuendius is acriter criminatus fuerat, quasi ab eo circumuentus & proditus esset. Verùm Biruiesca Hispanus & Nicolaus Zinnerus Germanus, ambo Iurecōsulti, atq; in ea causa iudices, qui sententiam tulerant, scriptum euulgât, & quare in illos uindicatum sit ostendunt. Schuuendium etiam purgant, & præter mandata Cæsaris nihil egisse dicunt.